

Nuummi inissimasussamik Nunatta inuiattut timersornikkut unammersuarterfissaannik pilersaarutip FIFA-p piumasaqaataanut naapertuuttumut aningaasalersorneqarnissaannut periarfissanik misuissuisussamik suleqatigiisitamik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut

(Inatsisartunut ilaasortaq Anders Olsen, Siumut)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Siullermeerneqarnera

Naalakkersuisut Inatsisartunut Ilaasortaq Anders Olsen, Siumut, siunnersuutaanut qujapput.

Inatsisartunut ilaasortaq Anders Olsen, Siumut, UPA2015-imi siunnersuuteqarneratigut nunatta inuiattut timersornikkut unammersuarterfissaannik qulisamik "National Stadion"-imik pilersitsinissamut pilersaarummik suliaqaqqullugit Naalakkersuisut Inatsisartunit pisussaaffilerneqarput. Unammersuarterfiup pilersinneranut ingerlanneranullu atatillugu pissutsit suliaasanut aningaasaqarnermullu tunngasut misissorneqarnerat pilersaarummut ilaassapput, UKA 2016-imullu atatillugu saqqummiunneqassallutik. Pilersitsinissamut pilersaarut maanna suliarineqalereersimalerpoq, tassanilu paasinarsivoq, sanaartornermut aningaasartuutit, National Stadioniliornissamut 303,87 mio. kr. missiliunneqartut akunnittarfeqangitsumut, akunnittarfilimmullu 453,76 mio. kr. missiliunneqarlutik.

Naalakkersuisut assortunngilaat, sanaartorneq taama annertutigisoq Namminersorlutik Oqartussaniinnaq aningaasalersorneqarsinnaangitsaq, taamaammatt suleqatigiissitamik pilersitsinissaq pissusissamisoorpoq, sapinngisamik pisariinnerpaamik aningaasaleeriaatsimik nassaarsiortussamik.

Suli ilisimaneqanngilaq avataaniit aningaasaliisussaqaqarnersoq imaluunniit ilivitsumik ilaannakortumilluunniit nunatta karsianiit aningaasaliisoqassanersoq. Nunatta karsianiit ilivitsumik aningaasaliisoqassappat, politikikkut pingaarnersiuilluni aningaasamut inatsimmi piareersaalluni pissaaq. Ilisimatitsissutigineqassaaq, 2018-imut Aningaasanut Inatsimmi siunertarineqartumi, taamatut pingaarnersuiinnermi aporfeqaalussammat, taamaattumik pingaarnersuiineq sakkortooq atorineqartariaqassalluni aningaasanut inatsisiliornissami.

Siunnersuuteqartup suleriaatsit marluk eqqarsaatigisimavai, tassa suleqatigiissitaq Naalakkersuisoqarfimmi sulisunik susassaartunik inuttalik kiisalu suleqatigiissitaq avataaneersunik inuttalik.

Naalakkersuisut takorloorpaat suleqatigiissitap Naalakkersuisoqarfimmiit avataaniillu sulisut ujartortariaqassagai, tassani timersornermiit aallartitat aamma kommunimiit.

Naalakkersuisut malugeqqussavaat, suleqatigiissitamik pilersitsilikkersaarneq, timersornerup aallartitaat Kommuneqarfik Sermersuumulluunniit sulii eqqartueqatigiissutaanikuunngimmat. Taamaattumik inernilerneqarsinnaanngilaq suleqatigiissitaq taakkuninnga ilaatigut inuttaqartoq pilersinneqarsinnaassasoq, taakkumi Naalakkersuisut suleriesissamik ilitsersuussisinnaanerata avataaniimmata.

Inatsisartut siunnersuutigineqartoq akuerissappassuk, Naalakkersuisut neriorsuutigisinnaanngilaat, Nunatta Karsia imaluunniit Kommuneqarfik Sermersooq sanaartugassamut aningaasaleeqataassasut aamma ingammik ilisimasat aningaasanut missingersuutitut tunngasut killeqarneri tunngavigalugit.

Inatsisartuni aalajangiiffigisassaq akuerineqassappat Naalakkersuisut suleqatigiissitamut suliarisat allassimaffiannik sanassapput, ilaatigut aningaasaqarnermut, katitigaanermik suliassanillu piumasaaqatitalimmik.

Ilisimatitsissutigineqassaarli, Naalakkersuisut neriorsuisinnaanngimmata, nunatta karsia imaluunniit Kommuneqarfik Sermersooq sanaartornissamut aningaasaliissasut, immikkullu siumoortumik aningaasaliiffigineqartussap aningaasartalerneqariinngitsup annertussusaa ilisimaneqanngimmat

Taamatut oqaaseqarlunga Naalakkersuisut siunnersuut akuerivaat.